

SEGENSGEBET ZUM VISIONSPROZESS

Immer bist du, Gott,
unterwegs zu uns.
Nimm uns mit auf deinem
Weg zu den Menschen.

Unsere Zukunft
füllst du mit Hoffnung.
Lass uns die ungeahnten
Möglichkeiten entdecken,
die du in die Welt legst.

Gib unseren Augen
einen weiten Blick,
den Händen Kraft
und den Gedanken Mut,
um dich in unsrem Alltag
zu entdecken.

Segne uns,
damit wir zum Segen
werden für die Welt.

VORREPÄLZISCH

Seechensgebet fer des, was kummt,
in de Blick zu nemme
Alsfort bischt Du, unser Gott,
uffm Weech zu uns.
Nemm uns dodebei mit
uff dein Weech zu deine Menschekinner.

Was fer uns do vor uns licht,
duscht du voll mache mit Hoffnung.
Loss sehe uns des allesminnanner,
wu meglisch werre kennt,
norre weil du
des alles schun in unser Welt
neigelecht hoscht.

Unser Aache – losse weit naus gugge,
damit mer dich entdecken
in all dem, wu mer
jeden Daach dorchleewen.
Unser Ärm – mach se stark,
damit mer draalangen an des,
wu mer fer ennanner mache kennen.
Un unsern Kopp – lossen mudich
Gedanke spinne,
damit mer s Richdische dann aafangen,
wann die Zeit devor do is.

Du uns dein Seeche schenke
fer des, dass mer selwer zum Seeche werren
fer all die Menschekinner um uns rum.

HINNERPÄLZISCH

Guter Gott,
immerfort bischt du
uffem Weg zu uns.
Zeisch uns, wie aa mir
de Weg finnen
zu denne Mensche newer uns.

Loss uns niemols vegesse:
Alles, was uff uns zukummt,
du hoscht's in deine Hänn.
Mach, dass mir do un dort
wennigschdens e klääbissje ebbes ahnen
vun denne viele Wunner,
wo du in deiner Welt vesteckelt hoscht.

Helf uns, ins Weite se gucke,
enaus iwwer das, was mir wollen,
vestehn un können.
Gebb uns Hänn,
wo zugreifen un helfen, wo 's fehlt.
Lenk unser Gedanke,
gebb uns Aue un Herze,
wo siehn, dass du bei uns bischt,
egal, ob mer grad schaffen odder ruhn.

Guter Gott, sei bei uns,
sei unner un iwwer un newer uns
mit deine unendliche Lieb.
Mach, dass aa dorch uns
annere Mensche
dei Spure in de Welt siehn
un so de Weg finnen zu dir.

SAARPÄLZISCH

Liewa Gott,
du bischd immer med uns uffm Wää unn
laschd uns in unsrem Lääwe nit allään laafe.
Nemm uns uff demm Wää zu de Menschen
med! Ich glaawe feschk, dass Du wirklich
e gudda Babbe bischd unn fa uns all nur
Guddes willschd.

Do geheerd Hoffnung dezu fa alle Daah,
wo mer lääwe bis om Enn alles gudd werd.
Do geheert aa alles dezu, was du jedem
von uns in die Schees geleehd haschd unn
wo ma monchmol gar nit demedd rechend,
dass ma's honn odda konn.

Mach uns seerschk emol die Aue uff, dass
se erum gugge, immer weida unn weida bis
ma alles Scheene siehn, wo ma nur devor
„donggescheen“ soohn kinne. Nadierlich
werre ma aa all das se siehn krien, was
nit so gudd laafd unn was uns richtig viel
Huddel macht. Do brauche ma donn Hänn,
die wo nid im Hossesack stegge bleiwe. Unn
mir brauche Hirnschmalz, dass ma muudich
genungg sinn unn die Welt unn die Kirch do,
wo mer lääwe, e bissje besser mache.

Mit ännem Wort –
Gebb uns das, was ma „Segen“ nennt:
schbiere kinne, dass Du do bischd
unn's gudd med uns mänschk.
Unn die Leit, wo med uns lääwe,
solle genau das aa merke: durch uns!